

1 Tımoteo

ingante Pabodo cadota ante tänota nänö yewæmongainta

Tımoteo ingante Pabodo yewæmongampa

1 ¹Botö Pabodobo inömo imopa. Itota Codito nänö në da godongaïmo imopa. Itota Codito waa pönï nänö inö bai mönö adobai bacæmömipa, ante pönëmompä. İninque Itota Codito mönö në pönëningä tönö Wængongui mönö imonte në Ængaingä tönö botö imote äna ëñëñmote da godöna godïmo imopa. ²Tımoteo ëñëmi, Bitö acæbiimpa, ante bitö imite yewæmömopa. Edæ mönö wede pönëno ante apænebo në ëñëniimi inte bitö Itota Codito quïmi badinque näwä botö wëmi bai inömi imipa. İninque botö, Mæmpo Wængongui tönö Awënë Itota mönö Codito tönö bitö imite waadete pönö waa cæda ate bitö gänë entawencæbiimpa, ämopa.

Wadani wapiticæ nani odömönte apænedö

³Botö Mäatedöniabæ inömo pöninque bitö imite, Epeto inömo ee ongöe, nanguï antabopa. Mäniñömö wadani babæ wapiticæ nani odömönte apænedö ante në odömönte apænedönäni inänite bitö, Minitö godömenque mäninö ante odömönte apænedämaï iedäni, ante ämi ëñencædanimpa. Mänömainö ante do botö äninö bai nïwo adodö ante bitö imite ämopa. ⁴Ayæ, Dodäni önonque ante nani tedegainö ante pönënamai quëwëdäni, ante bitö ancæbiimpa. Ayæ adobai tömënäni wæmäidi tæiyænäni ante pönëninque, Æmönänidö ingainäni,

ante ancaa änewëñönäni bitö tömënäni inänite, Minitö mäninö ante pönënamai iedäni, ancæbiimpa. Edæ mäninö nani tedewëno beyæ tömënäni, Æbanö i, ante nanguï wæætedö wæætë änewënanipa töö. Wæætë edæ, Wængongui nänö cædö ante wede pönëninque mönö cæquënenö guiquënë tömënäni nani tedewëno beyæ pönömenque cætimpä.

⁵Mänömainö ante äninque botö, Tömënäni mïmö iïmai entawëninque waadete pönencædanimpa, ante ämopa. Edæ mïmö wæmö pönï entawëninque tömënäni Wængongui ingante wede nani pönëno beyæ waadete pönencædanimpa. Ayæ adobai nämä apænte adinque wentamö mongænämaï entawënanäni inte tömënäni waadete pönencædanimpa. ⁶İñæmpa pancadäniya mäninö ante ëñëninque Baa ante nïmpo cæte wadæ godinque önonque ante quëwënanipa.

⁷Möitee wodi nänö wææ yewæmongainö ante odömönte apæneinëmönipa, ante në änanä incæ tömënäni nani odömönte apæneyedë quïno apænedäni, ante ëñënamai inänipa töö. Adobai quïëmë ante apænedinque tömënäni, İïmai impa, iïmai impa, ante apænedäni incæte ëñënamai inäni inte apænedänipa.

⁸Möitee wodi nänö wææ yewæmongainö ante adinque nöingä cæmö ininque mäninö tömengä nänö wææ angainö inömo waa ante imaimpa, ante do ëñëmompä. ⁹Möitee wodi nänö wææ yewæmongainö ante Wængongui wïi në nö cædäni beyæ pönö wææ angacäimpa. Wæætë në ëñënamai cædäni tönö wadani mäninö ante

ēñēnāni incæ nē godōmenque wēnæ wēnæ cædāni tōnō tōmēnāni beyæ pōnō wææ angacāimpa, ante do ēñēmompa. Ayæ adobaī Wængonguī ingante Baa ante nē quēwēnāni tōnō wēnæ wēnæ cædāni beyæ wææ angatimpa. Nē tæiyæ waēmō entawēnāmaī inōnāni beyæ ayæ adobaī Wængonguī ingante nē badete todōnāni beyæ wææ angatimpa. Mæmpocā ingante wāānā inante nē wænōnāni beyæ ayæ adobaī waocā ingante nē piinte wænōnāni beyæ wææ angatimpa. ¹⁰Nānōogængā ināmaī iñongante nē towēnāni beyæ ayæ adobaī onguīñænāni nāna onguīñæncaya guēa towēnāni beyæ wææ angatimpa. Nē cæte quēwengā bacæcāimpa, ante waocā ingante nē godonte ænāni beyæ ayæ adobaī nē babæ ānāni beyæ wææ angatimpa. Wadāni inānite, Nō āmōnīpa ēñēedāni, ante nē babæ ānewēnāni beyæ ayæ adobaī nō odōmonte apænedō incæ nē wadō ante cædāni beyæ wææ angatimpa. Mānīnāni tōmānāni ēñēcædānīpa, ante Wængonguī mānīnō ante pōnō wææ angacāimpa, ante ēñēmompa.

¹¹Edæ Wængonguī nāō apāite ēmongampa, ante odōmonte apænecebiimpa, ante tōmengā nē waa inongā inte edæ tōmengā watapæ nānō apænedō ante pōnongā æntabopa. Ayæ nō nānō odōmonte apænedō ante Wængonguī nānō pōnō angainō ante adodō ānō impa.

**Wængonguī waadete nānō
pōnō cædō ante**

¹²Itota Codito mōnō Awēnē pōnō cæcā beyænque botō tæī ewocabo batabopa. Tōmengā iñōmō botō imote waa adinque, Bitō nē pōnēmi inte cōwē ædæmō cæbi imīpa. Inīnque bitō botō beyæ wadāni inānite nē cæbi bacæbiimpa, ante pōnō cægacāimpa. Mānōmaī beyæ botō tōmengā ingante waa ate pōnente apænebopa. ¹³Botō wēēnēdē Itota Codito ingante nē godō babæ ante ānewengaimo imopa. Tōmengā ingante nē pōnēnāni inānite wēnæ wēnæ

cæquīmo, ante nē togænōmo inte botō nē piinte quēwengaimo imopa. Incæte botō nē pōnēnāmaī inōmo inte, Quinō cæquīī, ante ēñēnāmaī inte cæbo adinque Wængonguī, Quēwencæbiimpa, ante pōnō waadete waa cægacāimpa.

¹⁴Mōnō Awēnē botō imo nanguī waadete pōnō cæcā adinque botō Itota Codito nempo quēwēnīnque nē wede pōnēmo badinque nē waadete pōnēmo bagaboimpa.

¹⁵Īmaī ante nō pōnī nāni ānō nāwangā ante impa, ante āmo ēñēmaimīnīpa. Itota Codito iñōmō, Wēnæ wēnæ cæmīni imīnite æmo beyænque quēwenguimīni, ante inguipoga wææ pongacāimpa. Tōmengā mānōmaī cæcā incæte wadāni wēnæ wēnæ cædāni iñōnāni botō tōmēmoque godōmenque wēnæ wēnæ nē cægaimo imopa. ¹⁶Mānōmaī beyænque tōmēmoque godōmenque wēnæ wēnæ cægaimo iñōmote Itota Codito pōnō waadete angā beyænque quēwengaboimpa. Wēēnēdē botō baī nē wēnæ wēnæ cægaināni inānite adinque Itota Codito, Botō weca cōwē wantæpiyæ nāni quēwenguinque pancadāniya botō imote pōnenguīnāni inānīpa, ante do ēñengacāimpa. Inīnque tōmengā, Botō nē waadete cædinque ee abo imopa, ante tōmēnāni inānite odōmoncæte ante cædinque tōmengā botō Pabodobo imote mānōmaī pōnō waadete waa cægacāimpa.

¹⁷Mōnō Wængonguī iñōmō cōwē wænāmaī nē quēwengaingā inongā inte tōmengā iñcayæ ate adobaī cōwē wænāmaī inte Awēnē Odeye inongā ingampa. Tōmengā awēmō iñōmō quēwēnongā iñongante mōnō waocabo tōmengā ingante ædō cæte aquīī. Tōmengā wæætē tōmāā nē ēñengaingā inongā ingampa. Inīnque tōmengā adocanque Wængonguī inongā iñongante mōnō tōmengā ingante cōwē waa aquimō anguēnē. Tōmengā ingante, Bitō nāō baī emōmi inōmi imīpa, ante apænedinque mōnō nīne cædāmaī inte cōwē watapæ angæimpa. Cōwē Īmaī babaimpa, ante Amēē, āmopa.

¹⁸Tímoteo, botö wëmi ëñëmi. Në pönënanï wëëñëñedë Wængonguï beyä apäenedinque bitö imitedö ante nani angainö bai adobainö ante apäenedinque botö iïmaï ämopa. Edä tömënanï nani angainö ante ëñente cædinque bitö tontadoidi nani cæbai adobai bitö cæquënëno ante guïñëñamaï inte wæætë tæï ewocate nangui cæcæbiimpa. ¹⁹Wængonguï ingante cöwë wede pönente incæbiimpa. Adobai mimö entawëmi inte nämä apante pönëninque wentamö mongänamaï inte bitö cöwë quëwencæbiimpa. Edä mini pönencabo iñöminite pancadaniya nämä apante änämaï inani inte Codito ingante nani pönëninö ante dobæ ñimpo cæte wadæ godänimpa. ²⁰Ïimëneo tönö Adecantodo adobai Wængonguï ingante ñimpo cædinque wadæ godatapa. Ïinque, Tömëna, Wængonguï ingante mönö wënæ wënæ ante babæ änämaï ingäimpa, ante ëñencædaimpa, ante cædinque tömëna inate Tatäna nempo pædæ godontabopa.

**Wængonguï ingante mönö
iïmaï apänecæiimpa**

2 ¹Mini pönencabo iñöminite botö täno iïmaï ämopa. Wængonguï ingante mini apäneyedë quïëmë mini äinënö ante apänecæminimpa. Tömengä ingante waa ate pönente apäenedinque waodäni tömänäni beyä ante apänecæminimpa ämopa. ²Awënë odeyeidi incæ pönömenque awënëidi tömänäni incæ mönö imonte waa aayönäni mönö piyänë cæte quëwengäimpa, ante cædinque minitö tömënanï beyä ante Wængonguï ingante apänecæminimpa. Edä Wængonguï ingante mönö cæquënëno ante ayä waodäni inänite mönö cæquënëno ante mönö waa cæte quëwencæmöimpa, ante Wængonguï ingante awënëidi beyä ante apänecæminimpa. ³Mänömainö ante mönö apänedö iñömö waa impa. Wængonguï mönö imonte në Ängäingä inongä inte mäninö mönö apänedö ante waa acampa. ⁴Waodäni

tömänäni näwangä botö angainö ante ëñencædänimpa, ante Wængonguï pönö ængä beyænque quëwencædänimpa, ante në waa cæinënongä ingampa.

⁵Edä adocanque Wængonguï inongä ingacäimpa. Tömengä waodäni inänite adinque, Wadäni bai inänipa, ante nänënë quëwengacäimpa. Ïinque Itota Codito në Waocä ëñagaingä inte tæcæguedë adocanque në pongä inte, Waodäni Wængonguï guidënanï badinque adoyömö bee tente godongämæ quëwencædänimpa, ante pönö cægacäimpa. ⁶Tömengä iñömö mönö imonte ante godonte æncæte ante cædinque nämä wepæ incæ godoncæte ante në pongä ingacäimpa. Wængonguï, Ïionæ, ante nänö angäionæ incæ iinque bayonte mäninö Codito nänö cægainö ante, Nö impa, ante tömänäni inänite në odömongä ingacäimpa. ⁷Mäninö ante bitö në apänebi bacæbiimpa, ante Wængonguï botö imote angä ëñëninque botö tömengä nänö në da godömo batabopa, ante näwangä ämopa. Edä babæ änämaï imopa. Ayä näwangä mönö pönëno ante Wængonguï, Wadäni oodeoidi inämaï inani adobai pönencædänimpa, ante cædinque botö imote angä ëñëninque botö tömengä nänö në odömonte apänedömo imopa.

⁸Wayömö wayömö godongämæ mini pönencabo ongonde minitö onguïñämini iñömö në piinämaï imini inte Wængonguï ingante apänemini adinque botö waa tobaïmopa. Wadäni inänite në piinte wæætedö wæætë änämaï inte wæætë tæiyä waëmö entawëmini inte Wængonguï ingante pædæ æmpote apänecæminimpa, ante ainëmopa.

⁹Ayä onquiyämïni iñömö waëmö weocoo mongämïni incæte minitö, Botö waëmö weocoo mongæmo adinque wadäni botö imote waa acædänimpa, ante änämaï inte nämä baö ante guïñëñate pönëninque weocoo ædæmö wëñate mongæncæminimpa. Minitö ocaguï que que cæminï incæte oodo badöi tönö pededamö nani ämö wente cædämaï incæminimpa. Waëmoncöo

nāni nanguī godonte ænincōo nāni waa acoo ante mīnitō mongænāmaī incæmīnimpa. ¹⁰Wæætē edæ Wængongui ingante, Bitō Wængongui Awēnē imidō anguēnē, ante nē watapæ apænemīni imīni inique mīnitō mīni apæneī bai cædinque mīni waa cæquēnēnō ante pōnencæmīnimpa. Mānōmaīnō ante pōnente quēwencæmīnimpa, ante adobai aīnēmopa. ¹¹Wadāni apæneyōnāni mīnitō onquiyæmīni tededāmaī inte ēamonca ongonte ēñencæmīnimpa. Ayæ nē āmōni mōni ānō ante ēñēninque wadō pōnēnāmaī inte do ēñente cæcæmīnimpa, āmopa.

¹²Godongāmæ mīni pōnencabo weca ongonte mīnitō onquiyæmīni iñōmō odōmonte apænedāmaī incæmīnimpa, ante botō wææ āmopa. Ayæ adobai onguīñæmīni imīnite onquiyæmīni iñōmō, īīmaī cædāni, ante ānāmaī incæmīnimpa, ante wææ āmopa. Wæætē tededāmaī ēñencæmīnimpa. ¹³Wængongui edæ onguīñængā Adāo ingante tāno badōninque ayæ onquiyængā Eba ingante badongacāimpa. ¹⁴Ayæ Tatāna wīī Adāo ingante wapiticæ māocā oda cægacāī. Wæætē Eba ingante æpiticæmē māocā oda cædinque do wēnæ wēnæ cæcā bagacāimpa. ¹⁵Incæte onquiyænāni Wængongui ingante godōmenque pōnēninque cōwē waadete pōnēnāni inōnāni inte nē nō pōnente tæiyæ waēmō entawēnāni inique tōmēnāni wēñænāni inānite māñōnānite Wængongui wææ aacā beyænque quēwencædānimpa, āmopa.

Godongāmæ mōnō pōnencabo iñōmonte nē aadāni

3 ¹īīmaī ante nāni ānō nō pōnī ante impa. Godongāmæ mōnō pōnencabo iñōmonte, Aacæboimpa, ante nē angā iñōmō tōmengā waa cæquinō ante pōnō cæinengā ingampa. ²Incæte wadāni, Wēnæ wēnæ cæcā ingampa, ante ānāmaī incædānimpa, ante cædinque nē aacā wæætē waa quēwenguēngā ingampa. Edæ tōmengā nānōogænā adodanque nē

manguiwengā incæcāimpa. Tōmengā tōō pōnente nō quēwengā incæcāimpa. Nōinō cæcæimpa, ante pōnēninque nāmā wææ ante nē cæcā incæcāimpa. Waodāni botō imote waa acædānimpa, ante cædinque waa quēwencæcāimpa. Waodāni inānite, Botō oncōnē pō cæedāni, ante cōwē nē watapæ angā incæcāimpa. Ayæ tōmengā nē waa odōmonte apænecā incæcāimpa. ³Nē aacā tī nāmā bete beyæ quidi quidi dowænāmaī quēwenguēngā ingampa. Wacā ingā do piinte cædāmaī inongā inte wæætē ædæmō cæcā inte quēwencæcāimpa. Tōmengā piyænē cæcā incæcāimpa. Tōmengā godonte nāni æinta ante waadete pōnente wædāmaī incæcāimpa āmopa.

⁴Nē aacā tōnō godongāmæ quēwēnāni inānite tōmengā waa aaquēnengā ingampa. Tōmengā wēñænāni inānite ædæmō aacā beyæ tōmēnāni wæætē tōmengā ingante waa adinque tōmengā nānō ānō ante ēñente cæte quēwencædānimpa. ⁵Edæ nē aacā tōnō godongāmæ quēwēnāni inānite tōmengā wīī waa aacā inique Codito ingante godongāmæ mōnō pōnencabo iñōmonte ædō cæte waa aacā inguingā.

⁶Itota Codito ingante nōwo tæcæ pōnēningā wīī nē aacā baquēnengā ingampa. Edæ mānōmaī inongā iñongante mīnitō, Nē aabi imipa, āmīni inique tōmengā nāmā incæ, Adoboque waa cæbo imopa, ante pōnengā imaingampa. Wēnæ awēnē mānōmaī pōnengā beyænque Wængongui tōmengā ingante apænte nānō panguinō bai nē aacā ingante adobai apænte pāmaingampa. ⁷Ayæ adobai Itota Codito ingante nē pōnēnāmaī ināni nē aacā ingante adinque, Tōmengā nē waa cæcā ingampa, ante acædānimpa, ante cædinque tōmengā waa quēwenguēngā ingampa. Tōmengā waa cædāmaī ingā adinque tōmēnāni wæætē, Tōmengā wēnæ wēnæ cæcā ingampa, ante pīīmaīnānīpa. Tōmengā waa cædāmaī ingā pīīnāni inique wēnæ awēnē iñōmō, Tōmengā

oda cæcæcäimpa, ante godö cæcä ate tömengä do wënæ wënæ cæcä babaingampa.

**Mönö pönencabo tönö
godongämæ në cædäni**

⁸Mönö pönencabo tönö godongämæ në cædäni iñömö adobaí, Mönö eyepæ cæte quëwëmö ininque wadäni mönö imonte waa acædänimpa, ante cædinque waa quëwenguënänäni inänipa. Në cædäni nämä näni äno baí ante nö cæcædänimpa. Tömänäni yowepæ wædænque tí námæ biinömæ näni ämæ wíi nanguí becædänimpa. Babæ cæmöni incæte godonte näni æinta cöwë godömenque æncæmönimpa, ante wadäni näni pönëwënonque ante iñänäni wæætë mäninö ante pönënämaí incædänimpa. ⁹Edæ nämä apænte pönëninque wentamö mongænämaí entawënäni inte tömënäni Wængonguí nänö wë wodonte angainö ante tæcæ ëñëninque tömënäni, Nö pöní mönö pönënö impa, ante cöwë wede pönenguënänäni inänipa. ¹⁰Ayæ mäninäni inänite minitö, Quinö cæmíni imíni, ante ëñencæte ante cöwä acæmínimpa. Ayömíni tömënäni cöwë waa cæte quëwënäni adinque minitö wæætë tömënäni inänite, Minitö mönö pönencabo tönö godongämæ në cæmíni bacæmínimpa, ante ämíni bacædänimpa.

¹¹Tömënäni nänöogæidi inänite wadäni waa acædänimpa, ante cædinque adobaí eyepæ cæte waa quëwenguënänäni inänipa. Mäninäni iñömö wadäni inänitedö ante babæ änämaí incædänimpa. Wæætë adodäni cöwë töö pönente nö quëwënäni incædänimpa. Tömënäni cöwë pönëninque, Íimaí cæcæmönimpa, ante näni äninö baí ædæmö cæcædänimpa. ¹²Mönö pönencabo tönö godongämæ në cæcä iñömö tömengä nänöogænä adodanque në manguíwengä incæcäimpa. Tömengä wënænäni inänite ayæ tömengä tönö godongämæ quëwënäni inänite tömengä në waa aaquëngä ingampa. ¹³Mönö

pönencabo tönö godongämæ në cædäni iñömö, Në waa cædinäni inänipa, ante adinque mönö tömënäni inänite waa ämompä. Ayæ mänömaí waa cædinäni inte mäninäni, Itota Codito ingante pönëedäni, ante guiñënämaí apænecædänimpa.

**Wë wodonte näni angainö
edonque pöní batimpa, ante**

¹⁴Quingæ bitö weca acæ poncæboimpa, ante pönëmo incæte botö, Íimaí cæe, ante bitö imite yewæmömopa. ¹⁵Botö wæætë wíi quingæ pömo ininque bitö, Mönö Wængonguí tönö godongämæ quëwencabo iñömö inte mönö æbänö cæquíi, ante bitö ëñencæbiimpa, ante yewæmömopa. Edæ Wængonguí në Quëwengaingä químö iñömö inte mönö Codito ingante godongämæ mönö pönencabo iñömö mönö cobacadewæ tæi ongö baí tömengä nö nänö angainö ante ñimpo cædämaí inte wæætë wææ cæmö imompa. ¹⁶Íimaí ante nö pöní impa. Wængonguí ayongä mönö æbänö waa cæte quëwenguíi, ante Wængonguí wë wodonte nö nänö angainö incæ ñöwoyedë edonque pöní mönö ëñënö iñömö waa pöní impa. Íimaí impa.

Wængonguí inguipoga iñömö
ponte ëñadinque Waocä bacä
agadänimpa.

Tömengä ingantedö ante
Wængonguí Önöwoca, Mäningä
waëmö quëwënongä ingampa,
angacäimpa.

Tömengä ingante Wængonguí
anquedoidi do agadänimpa.

Wabæca wabæca näni quëwencabo
inänite Itota nänö cægainö ante
apænëgatimpa.

Tömämæ quëwënäni pancadäniya
tömengä ingante pönente
bagadänimpa.

Ayæ tömengä ñäö baí ëmöninque
öönædë iñömö ocæ ëmænte
gogacäimpa.

Mänömaíno ante näni ämotamíni äno
baí impa.

**Nē pönēnāni pancadāniya wadæ
goquīnāni inānīpa, ante**

4 ¹Wængonguī Ōnōwoca iīmaī ante edonque pōnī apænecampa. Īnque iīōnæidi bayonte Codito ingante nē pönēnāni incæ pancadāniya űnīmpo cæte tōmengā ingante pönēnāmaī bacædānīmpa. Īnque ōnōwocaidi incæ nē, Wapiticæ oda cæcædānīmpa, ante nē wænæ wænæ cædōnāni mīñæ tee empo gocædānīmpa. Goyōnāni wænæidi nāni odōmonte apænewēnō ēñente cæquīnāni inānīpa. ²Nē babæ ānāni nē wadō tedete wadō cædāni iīōmō tōmēnāni mānīnō wænæidi nāni odōmonte apænewēnō ante nē odōmonte apænēdāni inānīpa. Īnāni guiquēnē tōmēnāni nāmā nāni apænte pönēnō ante ōmætawēnāni inte wænæ wænæ nāni cædinō ante wædāmaī quēwēnānīpa. ³Mānīnāni iīōmō waodāni inānite wææ ānīnque, Mīnitō, Botō nānōogængā, ante onquiyængā ingante mōnāmaī iedāni, ānānīpa. Ayæ adobaī mōnō waa cænguī adīnque pancaa ante, Cænāmaī iedāni, ante wææ ānānīpa. Īñæmpa Wængonguī edæ tōmāā cænguī badongacāiṃpa. Tōmengā, Botō imote waa ate pōnente apænēdinque nē pönēnāni iīōmō botō nō angāinō ante ēñēnōnāni inte cænguī ænte cæncædānīmpa, angampa.

⁴Edæ Wængonguī nānō badongaincoo tōmancoo waa pōnī i iīonte mōnō Wængonguī ingante waa ate pōnente apænēdinque tōmāā cænguī æmō īnīnque pancaa ante ædō cæte Baa ante ænāmaī inguīī. ⁵Īñæmpa Wængonguī nānō angāinō beyænque ayæ tōmengā ingante waa ate pōnente apænēmō beyænque tōmāā cænguī iīōmō tæiyæ waēmō cænguī bapa.

Itota Codito ingante nē waa cæcā

⁶Bitō godongāmæ mīni pōnencabo iīōmīnite bitō mānīnō botō ānō ēñēnīnque bitō tōnīñadāni inānite wæætē odōmōmi īnīnque Itota Codito beyæ nē waa cæquīmi incæbiīmpa. Ayæ Wængonguī nānō angāinō ante mōnō

pönēnō ante ēñente quēwēnīnque bitō waa mōnō odōmonte apænēdō ante nē ēñente cædimi inte edæ tōmo cænte bai nē nō cæbi incæbiīmpa.

⁷Babæidi bai nē tedewēnāni inānite ēñēnāmaī inte bitō onquiyēnāni picænāni incæ ōnonquedō ante nāni tedewēnīnō ante ēñēnāmaī incæbiīmpa. Wæætē, Wængonguī ayongā mōnō waa cæte quēwencæte ante cædinque bitō iīōmō tæī ēwocabo badīnque cæcæboīmpa, ante godōmenque godōmenque cæcæbiīmpa. ⁸Mōnō baō tæāēmō bacæīmpa, ante cædinque mōnō űnīmpo cædāmaī inte adodō adodō cæmōmpa. Mānīnonque ante mōnō cædō guiquēnē wædænque waa īmpa. Wæætē Wængonguī ayongā mōnō waa cæte quēwēmō īnīnque mōnō űōwoyedē waa quēwēnīnque adobaī iīncayæ ate waa quēwenguīmō incæmōīmpa. Īnque mānīnō ante mōnō cæquīnō iīōmō tōmāā beyæ nō waa pōnī i īnīnque, Mōnō tæī ēwocauīmō, ante cædinque mōnō űnīmpo cædāmaī inte adodō adodō cæcæīmpa.

⁹Mānōmainō ante nō pōnī nāni ānō nāwangā ante īmpa, ante āmo ēñēmaīmīnīpa. ¹⁰Mānōmaī beyæ tæī pīñænīnque nanguī cæmō īmōmpa. Edæ, Wængonguī nē Quēwengāingā beyænque mōnō watapæ quēwengæīmpa, ante pōnengāimō īmōmpa. Tōmengā iīōmō mōnō waocabo tōmāmō īmonte, Quēwenguīmīni, ante nē Ængāingā incæ tōmengā ingante nē pōnēmō iīōmonte nō ængā beyænque mōnō quēwengæīmpa.

¹¹Mānīnō botō ānō ante bitō tōmēnāni inānite, Īmaī cæedāni, ante odōmonte apænecæbiīmpa, āmopa. ¹²Bitō wīī picæmi incæte æcāmenque iīngante bitō, Botō imote pīinte adāmaī incæcāiṃpa, ante pōnente quēwencæbiīmpa. Wæætē edæ bitō Wængonguī ingante nē pönēnāni beyæ ante, Botō cæbaī tōmēnāni adobaī cæcædānīmpa, ante iīmaī cæcæbiīmpa. Apænēbi incæ waa cæte quēwēmi incæ waadete pōnēmi incæ wede pōnēmi īmi

incæ nō pōnente waa cæbi incæ bitō, Botō bai bacædānimpā, ante cædinque bitō cædō ante odōmōmi adinque tōmēnāni adobaī cæcædānimpā. ¹³Botō pōnāmaī inguinganca bitō ongōñōmō iñōmō Wængonguī angā ēñente nāni yewæmongainō adinque adodō ante ædæmō apænebi ēñencædānimpā. Ayæ Wængonguī ingantedō ante apænebi inte odōmonte apænebi ēñencædānimpā. Mānīnonque cæte ongoncæbiimpā. ¹⁴Mīni pōnencabo iñōmīnīte nē aadāni nāni Picæncabo iñōmō bitonga gampo cædinque Wængonguī beyæ apænedinque bitō imite, Bitō nē aabi badinque nē odōmonte apænebi bacæbiimpā, ante pōnō apænedānitapa. Īnīnque bitō do nē aabi badinque nē odōmonte apænebi bagaīmi inte godōmenque godōmenque cæcæbiimpā.

¹⁵Edæ waodāni tōmānāni bitō æbānō godōmenque waa cæbi imi adinque ēñencædānimpā, ante cædinque bitō mānīnonque ante pōnēnīnque godōmenque godōmenque cæcæbiimpā.

¹⁶Bitō quēwēnō ante, Æbānō quēwēmoo, ante nāmā wææ aacæbiimpā. Ayæ bitō odōmonte apænedō ante, Botō nō pōnēnīnque odōmonte apæneceboimpā, ante wææ cæcæbiimpā. Edæ mānōmaī cæte wæntædāmaī inte cōwē cæcæbiimpā. Bitō mānōmaī cæbi ĩnīnque tōmēmi nāmā incæ wantæpiyæ quēwencæbiimpā. Bitō odōmonte apæneyōmi nē ēñēnāni iñōmō adobaī bitō cædō beyænque wantæpiyæ quēwencædānimpā.

Nē pōnēnāni ĩnānīte æbānō cæcæbiimpā, ante

5 ¹Onguīñængā picængā wēnæ wēnæ cæcā incæte tōmēngā ingante piīnte ānāmaī incæbiimpā. Wæætē tōmēmi mæmpocā ingante ante bai tōmēngā ingante waadete āmi ēñencæcāimpā. Edēnīnāni iñōmō tōmēmi biwīidi ĩnānīte ante bai tōmēnāni ĩnānīte waadete āmi ēñencædānimpā. ²Onquiyænāni picænāni iñōmō tōmēmi wāānā ĩnante

ante bai bitō tōmēnāni ĩnānīte adobaī waadete āmi ēñencædānimpā. Ayæ baquedāni iñōmō tōmēmi biwīnqueidi ĩnānīte ante bai tōmēnāni ĩnānīte waemō mīmōnē waadete ancæbiimpā.

³Owæmpoīnāni nē nāwangā ōmæpodāni inte quēwēnānīpa, ante tōmēnāni ĩnānīte waa adinque pōnō cæcæbiimpā. ⁴Incæte owæmpoīngā wēñænāni næængā ĩnīnque nānōmōidi næængā ĩnīnque mānīnāni wæætē tōmēngā beyæ cæquēñēnānīpa.

Edæ mānīnāni tāno tōmēnāni tōnō godongāmæ quēwēnāni ĩnānīte waa adinque næmæ nāni cæquēñēnō ante, Æbānō cæquīī, ante ēñente cæcædānimpā. Mānōmaī cædinque tōmēnāni mæmpōidi tōnō mæmæidi tōmēnāni ĩnānīte waadete nāni cædī bai ĩnāni adobaī mæmpōidi tōnō mæmæidi ĩnānīte næmæ waadete cæcædānimpā. Edæ mānōmaī cædāni adinque Wængonguī waa acæcāimpā. ⁵Nē nō ōmæpocā ĩnongā inte adodanque quēwēngā ĩnīnque tōmēngā nē owæmpoīngā ĩnongā inte Wængonguī beyænque watapæ quēwēngæimpā, ante pōnēngā ingampa. Itædē incæ woyowotæ incæ tōmēngā ñīmpo cædāmaī inte, Botō beyæ cæquīmi, ante Wængonguī ingante apænete quēwēngampa. ⁶Wæætē owæmpoīngā tote quēwēngæimpā, ante nāmanque pōnente nē quēwēnongā guīquēñē tōmēngā mīī quēwēngā incæte do wænte bai ingampa tōō.

⁷Tōmēnāni ĩnānītedō ante wēnæ wēnæ ānāmaī incædānimpā, ante wææ cædinque bitō mānīnō botō ānō ante adodō ante āmi ēñencædānimpā.

⁸Æcānō guīdēñāni ĩnānīte pōnō cædāmaī ĩnaa ayæ tōmēngā nāni wencabo ĩnānīte pōnō cædāmaī ĩnaa tōmēngā iñōmō Wængonguī nānō angāinō mōnō pōñēnō ante do Baa ānīnque wīī ēñente cæcampa. Ayæ nē pōnēnāmaī ingā wēnæ wēnæ cæcā ĩñongante māningā iñōmō godōmenque wēnæ wēnæ cæcā ingampa tōō.

⁹Owæmpoīnā do tetenta wædopo ganca godōmenque nē picænā ĩnōnā

inte tōmēnā nānōogängä wodi ingante nē mōninanque quēwēnā ingadāimpa, ante adinque bitō, Wängonguī qui, ante mōnō godonte āninta mānīnā owämpoinā nē ænguīnā incädäimpa, ante tōmēnā ēmōwo ante yewæmoncæbiimpa. ¹⁰Edæ tōmēnā wēñænāni inānite waa cädä pädāni inānitawo. Wadāni inānite tōmēnā, Botō oncōnē pō beedāni, ante waa apænedā inantawo. Wängonguī quīnāni iñōnānite tōmēnā nāmā pōnēnāmāi inte waa cädantawo. Nē wæwēnāni inānite adinque tōmēnā tōmēnāni tōnō godongāmæ cädantawo. Ayæ, Quiēmē waa cæcæimpa, ante mānīnonque ante pōnēninque cæte quēwēnantawo. Mānōmāi quēwēnā adinque waodāni, Mānīnā nōinā waa cädä inōnampa, ante do ēñēnāni inānitawo, ante adinque bitō wæætē tōmēnā ēmōwo ante yewæmoncæbiimpa. Ayæ wadāni mānīnā bai iñōnānite bitō, Wängonguī qui, ante mōnō godonte āninta mānimpodānique nē ænguīnāni incädāniimpa, ante tōmēnāni ēmōwo ante yewæmoncæbiimpa.

¹¹Wæætē edæ owämpoināni wīi picænāni iñōnānite bitō tōmēnāni ēmōwo ante yewæmōnāmāi inte Baa ancæbiimpa. Ayæ toinente wæwēninque Codito ingante ñimpo cæte wadæ godinque wæætē, Wacā nānōogängä ingante mōinēmopa, ante quēwēnānīpa. ¹²Edæ tōmēnāni Codito ingante, Botō bitō beyænque cæcæboimpa, ante tāno nāni angainō ante ñimpo cädāni beyæ Wängonguī apænte pangā wæcädāniimpa. ¹³Ayæ godōmenque iīmaī cädānīpa. Tōmēnāni cädāmāi inte wæntæye badinque adobāi wacōnē wacōnē acæte ante ōnonque godāni inānīpa tōō. Ayæ wīi ōnonque wæntæyedānique badinque tōmēnāni, Wadāni æbānō cädāniī, ante gote adinque wadāni nāni cädōnō ante godō wæntæ godō wæntæ tededāni inānīpa. Edæ wīi nāni anguēnēnō ante do ānewēnānīpa. ¹⁴Mānōmāi beyæ bitō owämpoināni wīi picænāni inānite

iīmaī āmopa. Mīnitō wæætē mōninque wēñænāni mædāni. Ayæ oncōnē mīni cæquēnēnō ante cædāni. Wadāni edæ mōnō imontedō ante wēnæ wēnæ nāni tedewēnō ante tededāmāi incädāniimpa, ante mīnitō mānōmāi cæte waa quēwēedāni, āmopa. ¹⁵Iñæmpa owämpoināni pancadāniya do Itota Codito ingante ēmō cæte godinque Tatāna mīñæ tee empocæ godānitapa tōō.

¹⁶Onquiængä nē pōnengä iñōmō tōmengä guidēnāni owämpoināni næængä ininque tōmengä tōmēnāni beyæ cæcæcæimpa. Codito ingante godongāmæ mīni pōnencabo iñōmīnite tōmengä, Botō guidēnāni inānite godōmīni æncädāniimpa, ante ānāmāi incæcæimpa. Mānōmāi cædinque Codito ingante mīni godongāmæ pōnencabo wæætē, Owämpoināni nāwangä ōmæpodāni inānīpa, ante adinque tōmēnāni inānite godōmīni æncädāniimpa, āmopa.

¹⁷Wängonguī ingante godongāmæ mīni pōnencabo iñōmīnite nē aadāni nāni Picæncabo iñōmō nō waa aadāni iñōnānite mīnitō tōmēnāni inānite waa aquēnēmīni imīnīpa. Mānīnāni Wängonguī nānō angainō ante nē apænedāni inte ayæ nē odōmonte apænedāni iñōnānite mīnitō godōmenque nanguī waa acæmīnīpa. ¹⁸Edæ Wängonguī iīmaīnō ante apæneçā ēñēninque yewæmongadāniimpa. “Wagada onguiñængä nē cæcä inte tōmentapo æ yacæiimpa, ante āmi pinā pinā gāwate cægōñongä bitō tōmengä ōnōne wææ wodōnedāmāi inte ee abi cæncæcæimpa,” ante yewæmongatīpa. Ayæ godōmenque iīmaī ante impa. “Nē cæcä iñōmō tōmengä nānō cædinō beyæ ante nē ænguēnengä ingampa.” Mānōmāi yewæmongadāniimpa.

¹⁹Godongāmæ mīni pōnencabo iñōmīni waocā adocanque iñōmō bitō imite apænedinque, Māningä nē aacā Picængä iñōmō wēnæ wēnæ cæcantapa tōō, ante āñongante bitō ēñēnāmāi incæbiimpa. Wæætē waoda mēnaa

ně babæ wapiticæ ânāmai ina inte bitō imite apænedinque, Tömengä në wënæ wënæ cæcantapa, ante adodō apæneda eñëninque bitō në äna inate eñencæbiimpa. Ayæ waodäni mengäa go adocanque adobaï adodō apænedäni eñëninque bitō në änäni inänite eñencæbiimpa.

²⁰Ně wënæ wënæ cædönäni incæ ñimpo cædāmai inänipa, ante adinque bitō wæætē godongāmæ ongönäni eñëñönäni mäninäni inänite nangui ancæbiimpa. Godongāmæ ongönäni eñëñönäni bitō mänōmai ämi ininque tömënäni wæætē guiñëninque, Wënæ wënæ mönō cæquinō ante cædāmai incæmōimpa, ante pönencædänimpa.

²¹Mönō Wængongui ayongä Itota Codito ayongä Wængongui nänō apænte äninäni anquedoidi ayönäni botō iïmai ämopa. Mäninō botō äninō ante eñente cædinque bitō, Adoyömō pönī inänipa, ante tömänäni inänite adoyömō godō cæbi incæbiimpa. Wīi adocanque ingante, Botō në waa adimi imipa, ante tömengä ingante wadō cædāmai incæbiimpa. ²²Æcämenque ingante, Mönō pönencabo beyæ bitō në cæbi baquimi, ante pönemi inte bitō tömengäa quingæ gampo cædāmai ie. Edæ quingæ gampo cæbi në cæcä badinque edæ tömengä wënæ wënæ cæcä ininque bitō adobaï tömengä tönō wënæ wënæ cæbi baquënëmi imipa. Bitō tömëmique godömenque wënæ wënæ nāni cæpāmo ante tömänō ante Baa ante waa cæte quëwëe.

²³Bitō cæinca cædente wæbitawo. Ayæ wantæ wantæ iñō wantæ wantæ iñō wënæ wënæ inte wæbitawo. Ininque wīi æpænque bee ämopa. Wæætē biinōmæ wædænque bete quëwencæbiimpa.

²⁴Wængongui nänō apænte anguiönæ badāmai iñedē incæ waodäni pancadäniya wënæ wënæ nāni cægäinō do edonque pönī impa. Wadäni guiquënë wënæ wënæ nāni cægäinō wë wodonte i incæ mäniñedē edonque pönī baquinō angüënë. ²⁵Ayæ adobaï waodäni waa nāni cægäinō do edonque

pönī impa. Ayæ ñöwoyedē panca waa nāni cægäinō wīi edonque pönī i incæte wīi cöwë wë wodonte ingæimpa. Wæætē edonque pönī aquinō angüënë.

6 ¹Waodäni awënëidi nāni në ö äninäni inte awënëidi beyænque cæte ñā cæyænte bai në quëwënäni iñömō tömënäni tömänäni awënëidi inänite waa eñente cæcædänimpa. Inæmpa tömënäni në pönënäni inte wīi waa eñente cædäni bai wadäni wæætē Wængongui emōwo ante wënæ wënæ ante babæ angüënëñänimpa. Adobaï mönō odömōnte apænedinō ante, Wënæ wënæ impa, ante angüënëñänimpa. ²Tömënäni awënëidi iñömō në pönënäni inäni beyænque në cædäni iñömō, Botō tönīñacanque inongä inte botō awënë iñömō önonganque ingä awædō, ante piñāmai incædänimpa. Wæætē edæ në cædäni iñömō, Botō cæbo në ængä iñömō në pönengä inongä inte Wængongui nänō në waadecä ingampa, ante adinque tömënäni awënëidi inänite godömenque waa eñente cæcædänimpa.

Nāwä mäincoo ante

Ininque Tímoteo eñëmi. Mäninō ante tömënäni inänite odömōnte apænedinque bitō adodō adodō ante anca ancæbiimpa, ämopa. ³Pancadäniya wadō ante odömōnte apænedinque mönō Awënë Itota Codito nö pönī nänō angäinō ante Baa änänipa. Ayæ mönō odömōnte apænedō ante tömënäni Wængongui ayongä mönō waa cæte quëwenguënëñō ante Baa änänipa. Ininque æcänō mänōmai Baa äna iñömō ⁴tömengä nämä incæ, Botō gomonga waa eñëmopa, ante në pönëñongä ingä incæte tömäa eñëñämaingä ingampa. Tömengä nämanque nänō pönëwëñō ante wætedō wæætē tededinque, Ædedō i, ante wacä tönō guëadō guëa äinëwente wæcampa. Tömengä mänōmai tedecä beyænque wadäni në gomonga eñengä ingante godō piinte adänipa. Godongāmæ wadodō wadō piinte tedewëñänipa. Wacä ingä wacä ingä, Bitō wënæ wënæ cæbi imipa, ante

ānewēnānīpa. Nāmā nāni wēnæ wēnæ pōnēnonque ante, Wadāni wēnæ wēnæ cædānīpa, ante pōnēwēnānīpa. ⁵Ayæ ocaidē pōnente wentamō encadāni inte tōmēnāni Wængonguī nāwangā nānō angaiñō incæ ēñēnāmaī badānīpa. Īnīnque nāni cabo incæ wacā ingā wacā ingā guēadō guēa apænete nāni piincabo ĩnānīpa. Ayæ mānīnāni adobaī, Wængonguī ayongā waa cæte quēwēmō beyænque nanguī ēate baquīmō, ante pōnēwēnānīpa.

⁶Īñæmpa māincoo quincōomē ēacā incæte, Mānīnque ēabopa, ante piyænē cæte quēwēnongā ĩñōmō tōmengā Wængonguī ayongā waa cæte quēwengā beyænque watapæ quēwēnongā inte nō nanguī ēacā ingampa. ⁷Edæ mōnō ĩ ĩnguipoga ĩñōmō ōmaamō pontamōmpa. Adobaī ōmaamō inte tao goquīmō ĩmōmpa. ⁸Incæte mōnō cænguī tōnō weocoo ēamō inte mānīnque beyæ mōnō watapæ quēwēngūinque ĩmōmpa. ⁹Wadāni guiquēnē, Māincoo nanguī ēainēmōnīpa, ante quēwēnāni inte tōmēnāni wēnæ wēnæ nāni cæinēmāmo badīnque oda cæte goquīnānidō anguēnē. Mānōmaī cædinque tōmēnāni, Quīnō ōnonque ĩmpa, ante æīnente badānīpa. Ayæ wēnæ wēnæ nāni baquinque edæ æīnēwēnāni inte quīēmē incæ tōmēnāni æmæwo ōmæ nāni ēwēnguīnonque gocædānīpa. ¹⁰Wadāni nāni godonte æīnta waadete pōnente nāni wædō beyæ wadō wadō nāni wēnæ wēnæ cæpāmo pompa. Edæ pancadāniya, Mōnō godonte ænguīnta ængæīmpa, ante pōnēnīnque tōmēnāni nāni wede pōnēnguēnēnō ñīmpo cæte wadæ godīnque nāmā nāni cædō beyænque nanguī wæwente badānītapa.

**Mōnō wede pōnēnō ante mōnō
tæī ēwocate cæcæīmpa**

¹¹Bitō guiquēnē Wængongūinque ĩngante nē cædōmī inte mānīnō tōmānō ante ñīmpo cæte wodīi gote baī quēwēncæbiīmpa, āmopa. Wæætē mōnō nō cæquēnēnō ante cæte quēwēncæbiīmpa. Wængonguī ayongā

mōnō waa cæte quēwēngæīmpa, ante cæcæbiīmpa. Mōnō wede pōnēmāmo, ante godōmenque pōnente quēwēncæbiīmpa. Waodāni ĩnānite godōmenque waadete pōnencæte ante cæcæbiīmpa. Ayæ tæī piñænte entawēnīnque wæntæye badāmaī inte ee cæcæbiīmpa. Cōwē ædāmō cæte quēwēncæbiīmpa. ¹²Wængonguī ĩngante mōnō wede pōnēnō ante mōnō cæquēnēnō ante bitō tæī ēwocate cæcæbiīmpa. Mōnō wænāmaī quēwēnguīnō goquīmō, ante pōnente ñīmpo cædāmaī incæbiīmpa. Edæ waodāni tæiyænāni ēñēñōnāni, bitō, Wængonguī ĩngante wede pōnente babopa, ante āñōmī Wængonguī edæ, Mānīnō quēwēnguīnō gocæbiīmpa, ante bitō ĩmite apænte aa pecantapa. ¹³Wængonguī pōnō cæcā beyænque quīngāmenque incæ tōmānāni quēwēnāni ĩnānīpa. Itota Codito ĩñōmō Pontio Pidato ĩngante apænedīnque, Quīnō nō ĩmpa, ante edonque pōnī apænegaīngā ĩngampa. Edæ Wængonguī tōnō Itota Codito mānōmaīnō ĩngaina ĩñōna botō tōmēna ayōna bitō ĩmite, Īīmaī cæe, āmopa. ¹⁴Mōnō Awēnē Itota Codito nānō ocæ ēmænte pongūinganca bitō mānīnō botō wææ ānō tōmānō ante waa ēñente cæcæbiīmpa, āmopa. Bitō ēñente cædō adīnque wadāni ædō cæte, Wēnæ wēnæ ĩmpa, ante anguīnānīi, ante pōnente cōwē waa pōnī cæcæbiīmpa. Mānōmaī ante āmopa.

¹⁵Wængonguī nānō aīnēnguīōnæ bayonte Itota ocæ ēmænte poncæcāīmpa. Mōnō Awēnē Wængonguī ĩñōmō tōmengā adocanque Wængongūinque ĩngaiñgā inte nē waa pōnī ĩnongā ĩngampa. Tōmēnāni awēnē odeyeidī ĩñōnānite tōmengā Tæiyæ Awēnē Odeye ĩnongā ĩngampa. Ayæ tōmengā ĩñōmō awēnēidī tōmānāni Awēnē ĩnongā ĩngampa. ¹⁶Tōmengā adocanque nē wantæpiyæ wænāmaī ĩnongā inte nē Quēwēngā ĩngaiñgā ĩngampa. Tōmengā tōmāā ñāō ĩñōmō quēwēnongā ĩñongante waodāni ædō cæte tōmengā weca goquīnānīi. Tōmengā mōnō

waocabo mönō nē adāmai ingaingā ingampa. Edæ tömengä ingante mönō ædō cæte aquīi. Tömenganque ingante waodāni tömänāni waa aquīnānidō anguēnē. Tömenganque cōwē nē tæi pīñæongä inte quingämenque quēwēnāni iñōnānite tömengä tömänāni Awēnē inguingānō anguēnē. Mänōmai babaimpa, ante, Amēē, ämopa.

¹⁷Inguipogaque mäincoo nē nanguī ēadāni inānite bitō iīmai ancæbiimpa. Nanguī ēamōni inte mönitō godōmenque waa pōni imōnīpa, ante pōnēnāmai iedāni. Iñæmpa mäincoo mönō ēadincoo iñōmō quingæ dæ ä apa quēwēnāni. Inique mīni mäincooque ante wīi mänincooque ante pōnēedāni. Wæætē, Wængonguinque beyænque watapæ quēwengæimpa, ante pōnēedāni, ancæbiimpa, ämopa. Edæ, Mönō quī quīnō dæ ä, ante wæmō adinque tömengä mönō imonte, Mīni watapæ quēwenguinque, ante tömäā nē pōnongä ænguimō imompa. ¹⁸Mänināni nē nanguī ēadāni inānite bitō, Mīnitō quīnō waa cæquīi, ante mäninonque cæcæminimpa, ancæbiimpa. Waa mīni cæquīnō ante mīnitō nanguī cæte quēwencæminimpa. Ayæ do Ao

ante mīnitō mäincoo mīni ēadincoo pancacooga pædæ godōmīni æncædānie, ancæbiimpa, ämopa. ¹⁹Mäninō bai nē cædōnānique, Mönō nämä beyæ ēaquincoo, ante öönædē iñōmō do cō cæte bai cædānīpa. Mänōmai cædinque tömēnāni, Nō pōni mönō quēwenguinque impa, ante iincayæ ate æncædānīmpa.

**Tímoteo ingante, Pabodo
iinique wææ angampa**

²⁰Tímoteo ēñēmi. Wængonguī, Wææ aacæbiimpa, ante bitō imite quīnō pōnongä bitō ö æninō ante wææ ae. Tæiyæ wæmō ewocadāmai inte wadāni önonquedō ante nāni änōnō ante ēñēnāmai iē. Adobaī wadāni, Mönitō ēñente ate nanguī encaimōni imōnīpa, ante nē babæ änāni iñōnānite bitō wadodō wadō nāni änewēnō ante ēñēnāmai iē. ²¹Tömēnāni nāni änewēnō ante pōnēninque waodāni pancadāniya Wængonguī ingante nāni pōnēninō ante do nīmpo cædinque wadæ godināni inānīpa.

Wængonguī bitō imite waadete pōnō cæcæcäimpa, ante botō mäninque ante yewæmōmopa.